

南無本師釋迦牟尼佛（三稱）

大般涅槃經後分卷下

機感荼毗品第三

爾時，拘尸城內一切男女悲泣流淚，不知荼毗法則云何？問阿難言：「如來涅槃，如何法則可以荼毗？」爾時帝釋具陳上事，而以答言：「如佛所說，依輪王法。」

爾時，拘尸城內一切人民悲泣流淚，總入城中，即作金棺七寶莊嚴，即辦微妙無價白氎千張，無數細軟妙兜羅綿，辦無數微妙梅檀沉水、百千萬種和香香泥香水、一切繒蓋旛華香等，如雲徧滿在於空中，積高須彌。既辦已訖，悲哀流淚，將至佛所，投如來前，悲咽不勝而伸供養。爾時，拘尸城內一切人民及諸大眾重復悲哀，哽咽流淚，復持無量香華、旛蓋、一切供具，如雲徧滿空中，互相執手，槌胸哽咽，涕泣盈目，哀震大千，投如來前，悲哀供養。爾時大眾悲哽嗚咽，深重敬心，各以細妙白氎障手，扶於如來入金棺中，注滿香油，棺門即閉。

爾時，拘尸城內一切士女貪福善心，總欲攝取如來功德，不令天人一切大眾同舉佛棺，即共詳議遣四力士壯大無雙，脫其所著瓔珞、衣服，期心請舉如來聖棺，欲入城內自伸供養，盡其神力都不能勝。爾時，城內復遣八大力士至聖棺所，脫所著衣，共擎佛棺，皆盡神力都亦不得。拘尸城內，復遣

十六極大力士來至棺所，脫所著衣，共舉佛棺亦不能勝。

爾時樓豆語力士言：「縱使盡城內人，男女大小，舉如來棺，欲入城內亦不能得，何況汝等而能勝耶？汝等當請大眾及諸天力，助汝舉棺乃得入城。」樓豆所言未訖，爾時帝釋即持微妙大七寶蓋，無數香華、旛蓋、音樂，與諸天眾悲泣流淚，垂在空中供養聖棺；至第六天及色界天，皆如帝釋供養聖棺。

爾時世尊大悲普覆，令諸世間得平等心得福無異，於娑羅林即自舉棺，昇虛空中，高一多羅樹。拘尸城內一切人民，及諸世間人天大眾等，共不得舉佛聖棺。

爾時帝釋及諸天眾，即持七寶大蓋，四柱寶臺四面莊嚴，七寶瓔珞垂虛空中覆佛聖棺，無數香華、幢旛、瓔珞、音樂、微妙雜綵空中供養；至第六天、色界諸天，倍前帝釋覆佛聖棺及所供養。爾時，拘尸城內一切人民，見佛聖棺昇在空中，槌胸大哭悲咽懊惱。

爾時一切天人於大聖尊寶棺前路，徧散七寶，真珠、香華、瓔珞、微妙雜綵，繽紛如雲，地及虛空悉皆徧滿，哀泣流淚，供養如來七寶靈棺，同聲唱言：「苦哉苦哉！我等無福，舉佛聖棺遂不能得，我等孤露，何有善根？」

爾時世尊大聖金棺，於娑羅林虛空之中徐徐乘空，從拘尸城西門而入。爾時拘尸城內一切士女、無數菩薩、聲聞、天人大眾，地及虛空悉皆徧滿，隨從如來大聖靈棺，互相執手號聲大哭，槌胸叫喚，啞咽流淚，各持無數香華、寶幢、旛蓋，地及虛空悉皆徧滿，悲號哀歎，供養靈棺。其拘尸那城一面縱廣四十八由旬，爾時如來七寶金棺徐徐乘空，從拘尸城東門而出，乘空右繞入城南門，漸漸空行從北門出，乘空左繞還從拘尸西門而入，如是展轉繞三匝已；乘空徐徐還入西門，乘空而行從東門出，空行左繞入城北門，漸漸空行從南門出，乘空右繞還入西門，如是展轉繞經四匝，如是左右繞拘尸城經於七匝。

爾時七寶聖棺當入城時，一切大眾悲號啞咽，各持無數微妙香木、栴檀、沉水、一切寶香，文理香潔，普熏世界；復持無數寶幢、旛蓋、香華、瓔珞至荼毗所，悲哀供養。爾時四天王及諸天眾悲泣流淚，各持天上上妙栴檀沉水，表裏香潔，芬馥周徧，各五百根大如車輪；復持一切寶香、寶幢、寶蓋、妙華、瓔珞至荼毗所悲哀供養；第二天各一千根，第三天各二千，第四天各三千，第五天各四千，第六天各五千，及旛華至荼毗所悲哀供養。爾時色界、無色諸天，唯有香華至荼毗所悲哀供養。

爾時一切世間大眾，各持微妙栴檀沉水、香華、幡蓋至荼毗所，悲哀供養。爾時樓豆涕泣盈目，哀悼無極，從諸天人乞妙香木、栴檀、沉水足六千根，文理香潔，芬馥周徧，至荼毗所悲哀供養。

阿耨達池四面縱廣二百由旬，出四大河。佛初成道恆河北岸，一樹栴檀隨佛而生，大如車輪，高七多羅樹，香氣普熏供養如來。其香樹神與樹俱生，常取此香供養於佛。佛入涅槃，此一檀樹即隨佛滅，枝葉俱落，神亦隨死。有諸異神取此香樹送荼毗所，悲哀供養。

其地乃是三世諸佛荼毗之處，大覺世尊乘本願力，亦於是處荼毗。是處有諸往古諸佛無量寶塔，金剛不壞堅固之處。爾時，如來大聖寶棺漸漸空行至荼毗所，徐徐乘空，下安七寶牀，其牀一切眾妙瓔珞、無價雜綵以為莊嚴。

於是時頃，復經七日，爾時拘尸城內一切士女、無數菩薩、聲聞，三十三天一切大眾悲哀哽咽，持諸幡蓋、寶幢、香華，隨從佛棺經於七日，以佛神力，一切天人無饑渴想，一無思食，唯見哀泣戀慕如來。既滿七日，大聖如來將欲出棺。爾時拘尸城內一切士女、無數大眾復大哀泣，震動世界，復持香華、無數幢幡、微妙天樂，投佛棺前哀咽供養。是時大眾悲哽流淚，各以細微白氈自障其手，深重敬心，從寶棺中

扶於如來紫磨黃金三十二相、八十種好、堅固不壞金剛之身，安詳而出，置七寶牀。

爾時大眾重大悲哀，聲震十方普佛世界，復持一切香華、繒蓋、音樂深心供養，悶絕哽咽投如來前。是時大眾復更悲咽，盈目流淚，各持無數香水香泥，深重敬心，從頭至足灌洗如來三十二相、八十種好、無量福德、智慧莊嚴、金剛堅固、紫磨黃金不壞色身，復洗寶棺微妙清淨。既灌洗已，是時大眾復大號哭，悲哀哽咽，燒微妙寶香，散七寶華、無數寶幢旛蓋，地及虛空悉皆徧滿，悲哀號泣供養如來。是時大眾銜哀暗咽，即持無數妙兜羅綿，從頭至足纏裹如來金剛色身。既纏身已，復以上妙無價白氎千張，於兜羅綿上次第相重纏如來身。纏身已訖，是時大眾重大悲哀，號哭悶絕，復持香華、旛蓋、寶幢、音樂哽咽供養。是時大眾哀泣流淚，深重敬心，各以白氎障手，暗咽悲哽，共扶如來入寶棺中，注滿香油，棺門尋閉。

爾時大眾重大悲哀，聲震世界，復持香華、旛蓋、音樂，號悼悲泣，供養寶棺。

爾時一切大眾，所集微妙香木積高須彌，芬馥香氣普熏世界，相重密次成大香樓，四面七寶莊嚴，幢蓋、旛華，瓔珞、雜綵徧空如雲，以為莊嚴，人天音樂悲哀供養。是時天人大

眾將欲舉棺至香樓上，復大悲哀，槌胸大叫，聲震大千。復持幢蓋、香華、音樂悲哀供養。是時大眾哀悼悲結，深重敬心，各以白氈障手，共舉如來大聖寶棺，置於莊嚴妙香樓上，復大號泣，絕而復蘇，唱言：「苦哉苦哉！何期孤露無有依恃。」悲咽流淚，復散香華、寶幢、旛蓋、音樂、雜綵，一切盡心，悲哀供養。

爾時，如來大聖寶棺既上微妙寶香樓已，將欲舉火荼毗如來。是時大眾復大號哭驚震大千，復更深重悲哀供養，大聖寶棺及妙香樓。爾時一切大眾哀泣盈目，各持七寶香炬大如車輪，豔彩光明徧照世界。一時大哭荼毗香樓，哀震大千一切世界，復以香華徧滿供養，是時寶炬至香樓所自然殄滅。是時一切大眾復持無上七寶大炬，燄光普照，悲哀流淚投香樓所，皆悉殄滅。

爾時一切海神持海中火七寶大炬，無數光燄，投香樓所亦皆殄滅。是時大眾長時號哭，一切供養，不知如來何緣未畢，投火香樓，荼毗不然？

爾時世尊大悲普潤，待迦葉眾來至乃然。時大迦葉與五百弟子在耆闍崛山，去拘尸城五十由旬，身心寂然入於三昧，於正受中倏爾心驚舉身顫慄，從定中出，見諸山地皆大震動，即知如來已入涅槃。告諸弟子：「我佛大師入般涅槃，時經

七日已入棺中。苦哉苦哉！應當疾往至如來所，恐已荼毗，不得見佛三十二相、八十種好真淨色身。」迦葉以敬佛故，不敢飛空往如來所，即將弟子尋路疾行，悲哀速往，正滿七日，至拘尸城城東路首。

迦葉遇見一婆羅門，執一天華隨路而來。迦葉問言：「仁者何來？」答曰：「佛般涅槃，我於荼毗所來。」復問：「此是何華？」答言：「於荼毗所，得此天華。」迦葉就乞，答言：「不得，我期將歸擬示六親家中供養。」迦葉就借著其頂上，便即悶絕，昏迷躡地，喑咽悲哽良久乃蘇。即自惟忖：「於此號泣，不見如來八十種好、紫磨色身，無所追憶，」即與弟子疾共前進，至拘尸城北門而入。

於其城中入一僧坊，見諸比丘叢聚一處，語迦葉言：「汝等遠來，深勞苦耶？安坐待食。」迦葉答言：「我之大師已入涅槃，我有何情安此待食？」諸比丘言：「汝師是誰？」答言：「汝不知耶？哀哉痛苦！大覺世尊今已涅槃。」比丘聞已各大歡喜，而作是言：「快哉快哉！如來在世禁制我等，戒律嚴峻，我等甚不堪忍不能依行，今已涅槃，嚴峻禁戒已應放捨。汝且待食，有何急耶？」佛神力故，掩諸天耳及大迦葉諸弟子等，皆悉不聞惡比丘語，唯有迦葉獨自聞之。於是迦葉即將弟子悲泣流淚，疾往佛所。

是時迦葉與諸弟子竊共思念：「我等如何得諸供物將至佛所，供養如來？」迦葉復言：「我自生長在此城中，乞供養物亦應可得。」

將諸弟子即就城內次第告乞，得妙白氈足滿千張，復得無數妙兜羅綿，復得無量寶華、香泥、香水、香油、寶幢、旛蓋、音樂弦歌、瓔珞、雜綵悉皆具足。迦葉與諸弟子悲哀流淚，即持疾往出城西門。

爾時迦葉，即聞荼毗之所一切大眾悲咽號哭，共問帝釋：「已供養訖，如何得火，然此香樓，荼毗如來？」帝釋答言：「人眾且待，摩訶迦葉即時而至。」釋言未訖，一切大眾正於哀中，即見迦葉與諸弟子尋路悲來，眾即停哀，便為開路。

迦葉前進，遙見佛棺，將諸弟子一時禮拜，號哭哽咽，悶絕躡地，昏濁亂心良久乃醒，流淚不勝，漸漸前行問大眾言：「如何得開大聖金棺？」大眾答言：「佛入涅槃已經二七，恐有損壞，如何得開？」迦葉答言：「如來之身金剛堅固，常樂我淨不可沮壞，德香芬馥，若梅檀山。」作是語已，涕泗交流至佛棺所。

爾時如來大悲平等，為迦葉故，棺自然開，白氈千張及兜羅



綿皆即解散，顯出三十二相、八十種好、真金紫磨堅固色身。迦葉與諸弟子見已，悶絕躡地，喑咽哀哽良久乃蘇，涕泣盈目，與諸弟子徐上香樓，近佛棺邊。復更喑咽，號哭悲哽，即以所得香華、旛蓋、寶幢、瓔珞、音樂、弦歌，哀號供養，即以香泥、香水灌洗如來金色之身，燒香散華，哀泣供養。灌洗已訖，迦葉與諸弟子，持其所得妙兜羅綿，纏於如來紫磨色身，次以舊綿纏新綿上；兜羅纏已，復以所得白氎千張，次第相重於兜羅上纏如來身；纏白氎已，復持舊氎著新氎上次第相纏；總纏已訖，棺門即閉，復以七寶瓔珞一切莊嚴。

爾時迦葉復重悲哀，與諸弟子右繞七匝，盈目流淚，長跪合掌說偈哀歎：

苦哉苦哉大聖尊	我今荼毒苦切心
世尊滅度一何速	大悲不能留待我
我於崛山禪定中	徧觀如來悉不見
又觀見佛已涅槃	倏爾心顫大震驚
忽見暗雲徧世界	復覩山地大震動
即知如來已涅槃	故我疾來已不見
世尊大悲不普我	令我不見佛涅槃
不蒙一言相教告	我今孤露何所依
世尊我今大痛苦	情亂迷悶昏濁心
我今為禮世尊頂	為復哀禮如來胸

為復敬禮大聖手 為復悲禮如來腰  
為復敬禮如來臍 為復深心禮佛足  
何苦不見佛涅槃 唯願示我敬禮處  
如來在世眾安樂 今入涅槃皆大苦  
哀哉哀哉深大苦 大悲示教所禮處

爾時迦葉哽咽悲哀，說是偈已，世尊大悲即現二足千輻輪相，出於棺外迴示迦葉，從千輻輪放千光明，徧照十方一切世界。爾時迦葉與諸弟子見佛足已，一時禮拜千輻輪相，即更悶絕，昏迷躡地良久乃醒。與諸弟子哀號哽咽，右繞七匝，繞七匝已，復禮佛足，悲哀哭泣，聲震世界，復更說偈，哀歎佛足：

如來究竟大悲心 平等慈光無二照  
眾生有感無不應 示我二足千輻輪  
我今深心歸命禮 千輻輪相二足尊  
千輻輪中放千光 徧照十方普佛刹  
我今歸依頭面禮 千輻輪相長光照  
眾生遇光皆解脫 三塗八難皆離苦  
我復歸依頭面禮 輪光普救諸惡趣  
世尊往昔無數劫 為我等故修苦行  
今證得此金剛體 足下由放千光明  
悲哀稽首歸命禮 安於眾生千輻輪  
佛修眾德為一切 修道樹日降四魔

四魔降已伏外道 眾生因此得正見  
稽首歸依頭面禮 眾生正見光明足  
佛為一切真慈父 足光平等度眾生  
我復歸依頭面禮 平等離苦輪足光  
我遇千輻光明足 悲喜交流哀切心  
我復悲哀頭面禮 有感千輻輪光相  
稽首歸依輪足光 乘究竟乘出三界  
敬禮天人歸依足 輪光普照三有苦  
眾生未得脫苦門 皆悉歸命輪光足  
我等輪迴未出離 如何輪足見放捨  
哀哉哀哉諸眾生 長夜莫覩輪足光  
悔過世尊大慈悲 示敬千輻輪光足  
哀哉今遇輪光相 自此當何復再覩

爾時迦葉與諸弟子說是偈已，復重悶絕，昏迷躡地良久漸醒，悲哀哽咽不能自裁。大覺世尊千輻輪相，金剛雙足還自入棺，封閉如故。爾時城內一切士女、天人、大眾，見大迦葉復重號哭，槌胸大叫，哀震大千無量世界，各將所持悲哽供養。

爾時拘尸城內，有四力士瓔珞嚴身，持七寶炬大如車輪，燄光普照，以焚香樓荼毗如來，炬投香樓自然殄滅。迦葉告言：「大聖寶棺，三界之火所不能燒，何況汝力而能焚耶？」

城內復有八大力士，更持七寶大炬光燄，一切將投棺所，亦皆殄滅；城內復有十六極大力士，各持七寶大炬來投香樓亦悉殄滅；城內復有三十六極大力士，各持七寶大炬來投亦皆殄滅。

爾時迦葉告諸力士、一切大眾：「汝等當知！縱使一切天人所有炬火，不能荼毗如來寶棺。汝等不煩勞苦，強欲為作。」爾時城內士女、天人、大眾復重悲哀，各以所持號泣供養，一時禮拜右繞七匝，悲號大哭聲震三千。

爾時如來以大悲力，從心胸中火踊棺外，漸漸荼毗經於七日，焚妙香樓，爾乃方盡。爾時城內士女、天人、大眾於七日間，悲號哭泣哀聲不斷，各以所持，供養不歇。

爾時四天王各作是念：「我以香水注火令滅，急收舍利，天上供養。」作是念已，即持七寶金瓶盛滿香水，復將須彌四埵，四大香潔出甘乳樹，樹各千圍，高百由旬，隨四天王同時而下至荼毗所。樹流甘乳，王寫香瓶，一時注火。注已，火勢轉高都無滅也。

爾時海神娑伽羅龍王，及江神河神見火不滅，各作是念：「我取香水注火令滅，急收舍利，住處供養。」作是念已，各持寶瓶，盛取無量香水至荼毗所，一時注火。注已，火勢如

故都亦不滅。

爾時樓豆語四天王及海神等：「汝注香水，令火滅者，可不欲取舍利還本所居，而供養耶？」答言：「實爾。」樓豆語四天王言：「汝大貪心。汝居天上，舍利隨汝，若在天宮，地居之人如何得往而供養耶？」復語海神：「汝等住在大海江河，如來舍利汝收取者，地居之人如何得往而供養耶？」爾時四天王即皆懺悔，悔已各還天宮；爾時大海、江、河神等，皆亦懺悔，誠如聖言，悔已各還。

#### 聖軀廓潤品第四

爾時帝釋持七寶瓶，及供養具至荼毗所，其火一時自然滅盡，帝釋即開如來寶棺，欲請佛牙。樓豆即問：「汝何為耶？」答言：「欲請佛牙，還天供養。」樓豆言：「莫輒自取，可待大眾，爾乃共分。」釋言：「佛先與我一牙舍利，是以我來，火即自滅。」帝釋說是語已，即開寶棺，於佛口中右畔上領取牙舍利，即還天上起塔供養。爾時有二捷疾羅剎隱身隨帝釋後，眾皆不見，盜取一雙佛牙舍利。

爾時城內一切士女、一切大眾，即一時來欲諍舍利。樓豆告言：「大眾當知，且待安詳。如佛所說，應當如法共分供養。」爾時城內士女、一切大眾，不聞樓豆所言，乃各執持矛稍、弓箭、刀劍、冑索、一切戰具，各自莊嚴欲取舍利。爾

時城內人眾即開佛棺，兜羅白氈宛然不燒。大眾見已復大號哭，流淚盈目，各將所持悲哀供養，深心禮拜，流淚長跪同說偈讚：

如來以大自在力	於一切世得自在
大悲本願處斯土	周旋苦海度眾生
無量智能神通力	出沒生死無罣礙
能以一身為多身	多身一身為無量
神變普應咸皆見	無緣即現入涅槃
我等福盡無應緣	故乃如來見放捨
佛於娑羅寶棺中	大力士舉皆不起
大悲之力自輕舉	昇空高一多羅樹
乘虛徐繞拘尸城	七日大聖繞七匝
繞已自臨荼毗所	不共神力所施為
一切天人莫能測	佛於大般涅槃中
金剛不壞力自在	一切荼毗火不然
自於心中出慈火	焚燒七日示現盡
天人不能滅此火	如來大悲示應力
帝釋來至火便滅	妙兜羅綿纏佛身
大火焚燒都不燃	白氈隨佛寶棺內
火中儼然而不燒	方知如來自在力
於法自在為法王	敬禮大悲三界尊
敬禮聖中無畏者	敬禮普覆大慈力
敬禮神變自在者	我等從今離世尊

沒苦無能見救護 哀哉哀哉大聖尊  
方今長別何由見

爾時大眾說是偈已，重復悲泣，各以所持，盡哀供養。

爾時樓豆普為天人一切大眾，與城內人共於棺所，徐舉白氎及兜羅綿，其迦葉等白氎千張火全不燒；其城內人白氎千張，除外一雙，餘者灰燼；其兜羅綿宛然如故。爾時樓豆取此白氎及兜羅綿，細破分之與諸大眾，令起寶塔而供養之；樓豆復取氎灰亦細分眾，令起寶塔而供養之；其餘灰燼無復得分，眾各自取，起塔供養。

其城內人，先已遣匠造八金壇、八師子座，各以七寶而為莊嚴，其七寶壇各受一斛，各置七寶師子座上。其八師子七寶之座，座別各有三十二力士，各嚴七寶、瓔珞、雜綵纏身，共舉七寶八師子座；座上復各有八婁女，身嚴七寶、瓔珞、雜綵持七寶壇；座上復各有八婁女，嚴身瓔珞，執七寶蓋覆金壇上；座上復各有八婁女，身嚴瓔珞，持七寶劍，衛七寶壇；座上復各有八婁女，身嚴瓔珞，執雉毛纛，豎壇四面；座別各有無量人眾持妙音樂、幢旛、寶蓋、香華、瓔珞圍繞供養；座各復有無量人眾，各持弓箭、矛稍、胃索、長鉤一切戰具而圍繞之，從拘尸城前後圍繞向荼毗所。

其八師子七寶之座出城去後，城內人眾即持無數香泥香水，尋力士後，平治塗地作香泥路，廣博嚴事向荼毗所。其路兩邊無數寶幢、旛蓋、香華、真珠、瓔珞、眾妙雜綵、音樂弦歌嚴飾路邊，儼然奉待大聖世尊舍利而還。其諸力士持八師子七寶之座，圍繞至荼毗所，即大哀泣，號哭哽咽聲震大千，各以所持深心供養。

爾時世尊大悲力故，碎金剛體成末舍利，唯留四牙不可沮壞，爾時大眾既見舍利復重悲哀，以其所持流淚供養。爾時樓豆與城內人涕泣盈目，收取舍利，著師子座七寶壇中，滿八金壇，舍利便盡。爾時一切天人、大眾見佛舍利入金壇中，重更悲哭，涕泣流淚，各將所持深心供養。

爾時城內諸大力士及諸士女，將欲持佛舍利金壇向拘尸城。爾時大眾復重悲哀，各將所持流淚供養。爾時城內諸大力士及圍繞眾，并城內人悲哽流淚，舉八師子七寶之座，隨香泥路迴向拘尸。爾時一切人天大眾復大悲哀，聲震世界，各將所持，隨從舍利哀號供養。

如來舍利至城內已，置四衢道中。爾時拘尸城人即嚴四兵，無數軍眾身著甲鎧，各執戰具繞拘尸城，四面周匝無數重兵儼然而住，擬防外人來抄掠故，雖為儀式無戰爭心。復有五百大呪術師，守城四門為遮難故。復有無數寶幢、旛蓋微妙



莊嚴，大雉毛纛，於城四維儼然供養，為標式故。爾時城內一切士女、天人大眾復大悲哀，各將所持深心供養。其舍利壘置師子座經於七日，於七日中，一切大眾日夜悲號，哀聲不斷，盡以所持深心供養。其八師子七寶之座，各有五百大呪術師各共持之，遮有天龍、夜叉、鬼神來欺奪故，經七日間。

爾時，如來本生眷屬：迦毗羅國王諸釋種等，佛神力故，都不覺知佛入涅槃。佛涅槃後經三七日，爾乃方知。

時彼國王諸釋種等悲哭號泣，即共疾來至拘尸城，見諸兵眾無數千人圍繞城外；復見寶幢、旛蓋列城四維，映發國界；復見大呪術師守城四門。王及釋等問呪師言：「佛涅槃耶？」答云：「佛涅槃來過四七日，荼毗已竟將分舍利。」王言：「我等是佛所生眷屬，佛神力故，令我不知如來涅槃。我今欲見如來舍利，卿可開路令我得入。」呪師兵眾聞是語已，即聽入城。

王及釋種得入城已，見佛舍利在師子座，悲號哽咽，涕淚交流，右繞七匝。繞七匝已，拭淚而言：「我今欲請如來舍利一分，將還供養。」大眾答言：「雖知汝是釋種眷屬，然佛世尊先已有言，分布舍利未見及汝，各有請主，汝云何得？汝可還耶。」爾時王及釋種不果所請，號哭悲哀，悶絕躡地

良久乃醒，悲不自勝語眾人言：「如來世尊是我釋種，愍汝等故於此涅槃。汝等如何見有欺忽，乃不分我一分舍利？」作是語訖，各禮舍利，右繞七匝，悲泣流淚心生忿恨，慨悼還家。

爾時，摩伽陀主阿闍世王害父王已，深生悔恨，身生惡瘡，既遇世尊月愛光觸，身瘡漸愈，來詣佛所求哀懺悔。世尊大悲，即以甘露微妙法藥洗蕩身瘡，極重罪滅即還本宮，都不覺知如來涅槃。於涅槃夜，夢見月落、日從地出，星宿雲雨繽紛而隕；復有煙氣從地而出，見七彗星現於天上；復夢天上有大火聚徧空熾然，一時墮地。夢已尋覺心大驚顛，即召諸臣，具陳斯夢：「此何祥耶？」臣答王言：「是佛涅槃不祥之相。佛滅度後，三界眾生、六道有識，煩惱橫起，故現大火從天落地；佛入滅度，月愛慈光、慧雲普潤悉皆滅沒，即夢月落；星落地者，佛涅槃後八萬律儀一切戒法，眾生違反不依佛教，乃行邪法墮於地獄；日出地者，佛涅槃後，三塗惡道苦聚，日光出現世間，故感斯夢。」

王聞是語，將諸臣從夜半即來至拘尸城，見諸無數四兵之眾，防衛拘尸無量重數，復見城門有呪術師防止外難。王見是已，即問呪師：「佛涅槃耶？」呪師答言：「佛涅槃來已經四七，當今大眾將分舍利。」王言：「佛入涅槃我都不知，我於夜夢見不祥事，以問諸臣，方知如來入大涅槃。我欲入

城禮拜如來金剛舍利，汝為通路。」呪師聞已，即聽入前。

王至城內四衢道中，見師子座舍利金壇，復覩大眾悲哀供養，王與徒眾一時禮拜，悲泣流淚，右繞七匝，哀慘供養。爾時，王就大眾請求如來一分舍利，還國供養。大眾答言：「何晚至耶？佛已先說分布方法，舍利皆已各有所請，無有仁分，仁可還宮。」阿闍世王不果所請，愁憂不樂，即禮舍利，惆悵而還。

爾時毗離外道名王，佛涅槃後經三七已爾乃方知，即將臣從疾往拘尸。既至拘尸，即見無數四兵之眾，防衛拘尸繞無量重。爾時阿勒伽羅王，佛涅槃後經三七已爾乃方知，即將臣從疾往拘尸。既至拘尸，即見無數四兵之眾，防衛拘尸繞無量重。爾時毗耨國不異王，佛入涅槃經三七已爾乃方知。爾時遮羅迦羅國王，佛入涅槃經三七已爾乃方知。爾時師伽那王，佛入涅槃經三七已爾乃方知。爾時波肩羅外道名王，佛入涅槃經三七已爾乃方知，即將臣從疾往拘尸。

既至拘尸，即見無數四兵之眾，防衛拘尸繞無量重。復見城門有大呪師防止外難，王問呪師：「佛涅槃耶？」答言：「佛涅槃來已經四七，當今大眾將分舍利。」王語呪師：「佛入涅槃我都不知，故今晚至。我欲入城禮拜供養如來舍利，汝可開路。」呪師聞王，即聽前入。至四衢道，見師子座七

寶莊嚴，安置舍利七寶金壇，復見大眾悲哀供養，王將徒眾一時禮拜，悲哀流淚右繞七匝，各齋所持淒慘供養。王語眾言：「佛入涅槃我都不知，一何苦哉不得見佛。請眾與我一分舍利還國供養。」眾言：「汝何來晚？佛已先說分布法軌，舍利皆已各有所請，無有仁分，仁可還宮。」王及臣眾不果所請，愁憂不樂，即禮舍利，悲戀而還。

爾時，迦毗羅等七國王臣不果所願，心懷悲憤，慨戀而還，各至本邑，咸遣使臣同詣拘尸再求舍利。城人報曰：「世尊慈父，既於我界而般涅槃，全身舍利應留永劫於此供養，終不分與外邑諸人。」諸國答曰：「若分者善；若不與者，我等當以彊力奪取。」城人告曰：「徒事鬥諍，終不可得。」闍王復使兩行大臣馳兵請分，告城人曰：「若與者善；若不見分，我加兵力彊奪將去。」答言：「任意。」

爾時拘尸城中，所有壯士男女並閑弓射，即便總出嚴整四兵，欲與諸邑交兵合戰。爾時，毗離國諸離車種遂集四兵，往拘尸城在一面住；阿勒國諸剎帝利，亦集四兵在一面住；毗耨國諸婆羅門，亦集四兵在一面住；遮羅迦羅國諸釋子，亦集四兵在一面住；師伽國拘樓羅，亦集四兵在一面住；波肩羅國力士亦集四兵，往拘尸城在一面住。爾時拘尸那城七軍圍繞，爲舍利故，各欲奪取。

爾時大眾中，有一婆羅門姓煙，在八軍中高聲大唱：「拘尸城諸力士主聽，佛無量劫積善修忍，諸君亦常聞讚忍法，今日何可於佛滅後，爲舍利故起兵相奪？諸君當知，此非敬事。舍利現在但當分作八分。」諸力士言：「敬如來議。」爾時姓煙婆羅門，即分舍利以爲八分，作八分竟，高聲大唱：「汝諸力士主聽，盛舍利瓶請以見與，欲還頭那羅聚落起瓶塔，華香、旛蓋、伎樂供養。」諸力士答言：「敬從來請。」爾時必波延那婆羅門居士，復以高聲大唱：「拘尸城中諸力士主聽，燒佛處炭與我，欲還本國起炭塔，華香、伎樂供養。」諸力士答婆羅門言：「敬從來請。」

爾時，拘尸城諸力士得第一分舍利，即於國中起塔，華香伎樂種種供養；波肩羅婆國力士得第二分舍利，還歸起塔種種供養；師伽那婆國拘樓羅眾得第三分舍利，還歸起塔種種供養；阿勒遮國諸刹帝利得第四分舍利，還國起塔供養；毗耨國諸婆羅門得第五分舍利，還國起塔種種供養；毗離國諸離車得第六分舍利，還國起塔種種供養；遮羅迦羅國諸釋子得第七分舍利，還國起塔華香供養；摩伽陀主阿闍世王得第八分舍利，還王舍城起塔，華香伎樂種種供養；姓煙婆羅門得盛舍利瓶，還頭那羅聚落起塔，華香供養；必波羅延那婆羅門居士得炭，還國起塔供養。

爾時，閻浮提中八舍利塔、第九瓶塔、第十炭塔，如是分布

舍利事已。時諸菩薩及聲聞眾、天、人、龍、鬼、國王、長者、大臣、人民一切大眾，悲號涕泣槌胸大哭，五體投地作禮而去。

大般涅槃經後分卷下

離婆離婆帝 求訶求訶帝 陀羅尼帝 尼訶囉帝  
毗黎你帝 摩訶伽帝 真陵乾帝 娑婆訶（七遍）

南無喝囉怛那 哆囉夜耶 佉囉佉囉  
俱住俱住 摩囉摩囉 虎囉 吽 賀賀  
蘇怛拏 吽 潑抹拏 娑婆訶（三遍）

願以此功德 莊嚴佛淨土 上報四聖恩 下濟六凡苦  
所有法界眾 悉修菩提行 盡此一報身 同生極樂國